

萬有文庫

第二集七百種

王雲五主編

廣羣芳譜

(七)

清聖祖敕撰

商務印書館發行

廣 羣 芳 譜

(七)

清聖祖敕撰

國學基本叢書

廣羣芳譜卷第二十六

花譜

桃花二

【集韻】五言古詩【原】晉陶潛桃花源詩【嬴氏亂天紀賢者避其世黃綺之商山伊人亦云逝往迹漫復湮來徑遂蕪廢相命肆農耕日入從所憩桑竹垂餘蔭菽稷隨時藝春蠶取長絲秋熟靡王稅荒路曖交通雞犬互鳴吠俎豆猶古法衣裳無新製童孺縱行歌斑白歡遊詣草榮識節和木衰知風厲雖無紀曆誌四時自成歲怡然有餘樂于何勞智慧奇蹤隱五百一朝敞神界淳薄既異源旋復還幽蔽借問遊方士焉測塵囂外願言躡輕風高舉尋吾契【梁簡文帝詠桃】初桃麗新彩照地吐其芳枝間留皆燕葉底發輕香飛花入露井交幹拂華堂若映窗前柳端疑紅粉妝【沈約詠桃】風來吹葉動風去畏花傷紅英已照灼况復含日光歌童暗理曲游女夜縫裳詎減當春淚能斷思人腸【任昉詠池邊桃】已謝西王苑復揖綏山枝聊逢賞者愛棲趾傍蓮池開紅春灼灼結實夏離離【隋蕭慤奉和詠龍門桃花】舊聞開露井今見植龍門樹少知非塞花高異小園論時應未發故欲影歸軒祇言經摘罷猶勝逐風翻【唐孔紹安應詔詠天桃】結葉還臨影飛香欲徧空不意餘花落翻沉露井中【原】李白古風

桃花開東園。含笑誇白日。偶蒙東風榮。生此豔陽質。豈無佳入色。但恐花不實。宛轉龍火飛。零落早相失。詎知南山松。獨立自蕭瑟。【寄東魯二稚子】吳地桑葉綠。吳蠶已三眠。我家寄東魯。誰種龜陰田。春事已不及。江行復茫然。南風吹歸心。飛墮酒樓前。樓東一株桃。枝葉拂青烟。此樹我所種。別來向三年。桃今與樓齊。我行尙未旋。嬌女字平陽。折花倚桃邊。折花不見我。淚下如流泉。小兒名伯禽。與姊亦齊肩。雙行桃樹下。撫背復誰憐。念此失次第。肝腸日憂煎。裂素寫遠意。因之汶陽川。【贈張籍新桃】桃生葉婆娑。枝葉四面多。高未出墻顛。蒿莧相凌摩。植之三年餘。今年初試花。秋來未成實。其陰良已嘉。青蟬不來鳴。安得迅羽過。常恐牽絲蟲。蒙纂成網羅。顧託戲童兒。勿折吾柔柯。明年結甘實。磊磊充汝家。【白居易種桃歌】食桃種其核。一年核生芽。二年長枝葉。三年桃有花。憶昨五六歲。灼灼盛芬華。迨茲八九載。有減而無加。去春已稀少。今春漸無多。明年後年後。芳意當如何。命酒樹下飲。停杯拾餘葩。因桃忽自感。悲吒成狂歌。【宋梅堯臣通判桃花廳】種桃西庭下。有意延東風。東風與雨至。染出枝上紅。花底有小鳥。其子曰桃蟲。既於桃得名。爲桃言女工。剪羅作舞衣。奉君歡莫窮。舉杯無愧者。避世武陵翁。【蘇軾次韻表兄程正輔江行見桃花】曲士賦懷沙。草木傷莽莽。德人無荆棘。坐失嶺嶠阻。我兄瑚璉姿。流落漳江浦。淨眼見桃花。紛紛墮紅雨。蕭然振衣袂。笑問散花女。我觀解語花。粉色如黃土。一言破千偈。况爾初不語。可憐一轉話。他日如何舉。故復此微吟。聊和嘔啞櫓。江邊閒草木。閑客當爲主。邇來子美瘦。正坐作

詩苦袖手焚筆研。清篇真漫與。願君理北轅。六轡去如組。上林桃花開。水煖鴻北翥。【元劉詵和羅昌逢千葉桃】閨嬴首增春。朔霽久連望。梅殘不留玉。桃盛忽成障。異姿奪衆妍。姝萼同一狀。重緋雜楊襲。疊綵迷下上。淚明露借光。影墮日分漾。紛披競年華。翦刻費天匠。先生被花惱。書罷時亦訪。亭空晝無人。山鳥立幽桁。橫波繞碧帶。老樹入古像。同遊無前度。得句有孤倡。仙源誰與期。微風起衣浪。【明仁宗桃園春曉】曙光猶未分。芳園露華炫。碧桃千萬樹。鮮妍如錦綉。隔林鶯語滑。兩兩間關囀。掖垣將啓扉。漏箭傳聲遠。花底候宮車。更覺東風軟。【袁凱桃谿】繁花亦何言。人至迹愈顯。因石自高下。緣源屢回轉。鶯啼陰久匝。雨霽苔猶淺。漁父欲問津。烟中聞雞犬。

【七言古詩】園【唐王維桃花源行】漁舟逐水愛山春。兩岸桃花夾去津。坐看紅樹不知遠。行盡青溪不見人。山口潛行始隈隩。山開曠望旋平陸。遙看一處攢雲樹。近入千家散花竹。樵客初傳漢姓名。居人未改秦衣服。居人共住武陵源。還從物外起田園。月明松下房櫳靜。日出雲中雞犬喧。驚聞俗客爭來集。競引還家問都邑。平明閭巷掃花開。薄暮漁樵乘水入。初因避地去人間。及至成仙遂不還。峽裏誰知有人事。世中遙望空雲山。不疑靈境難聞見。塵心未盡思鄉縣。出洞無論隔山水。辭家終擬長游衍。自謂經過舊不迷。安知峰壑今來變。當時只記入山深。青溪幾曲到雲林。春來遍是桃花水。不辨仙源何處尋。【李白寄遠】憶昨東園桃李紅。碧枝與君此時初別離。金瓶落井無消息。令人行歎復坐思。坐思行歎成

楚越春風玉顏畏銷歇。碧窗紛紛下落花。青樓寂寂空明月。兩不見。但相思。空留錦字表心素。至今緘愁不忍窺。【杜甫風雨看舟前落花戲爲新句】江上人家桃樹枝。春寒細雨入疎籬。影遭碧水潛勾引。風妒紅花却倒吹。吹花困癩旁舟楫。水光風力俱相怯。赤憎輕薄遮人懷。珍重分明不來接。濕久飛遲半欲高。縈沙惹草細于毛。蜜蜂蝴蝶生情性。偷眼蜻蜓避百勞。【韓愈桃源圖】神仙有無何渺茫。桃源之說誠荒唐。流水盤迴山百轉。生綃數幅垂中堂。武陵太守好事者。題緘遠寄南宮下。南宮先生欣得之。波濤入筆驅文辭。文工畫妙各臻極。異境恍忽移于斯。架巖鑿谷開宮室。接屋連牆千萬日。羸顛劉蹶了不聞。地坼天分非所恤。種桃處處惟開花。川源遠近蒸紅霞。初來猶自念鄉邑。歲久此地還成家。漁舟之子來何所。物色相猜更問語。大蛇中斷喪前王。羣馬南渡開新主。聽終詞絕共淒然。自說今經六百年。當時萬事皆眼見。不知幾許猶流傳。爭持酒食來相饋。禮數不同樽俎異。月明半宿玉堂空。骨冷魂清無夢寐。夜半金雞啁晰鳴。火輪飛出客心驚。人間有累不可住。依然離別難爲情。船開棹進一迴顧。萬里蒼蒼烟水暮。世俗寧知僞與真。至今傳者武陵人。【元稹南家桃】南家桃樹深紅色。日照露光看不得。樹小花狂風易吹。一夜風吹滿牆北。離人自有經時別。眼前落花心歎息。更待明年花滿枝。一年迢遞空相憶。【李咸用緋桃花歌】上帝春官思麗絕。天桃變態求新悅。便是花中傾國容。牡丹滋露長門月。野樹滴殘鵲叫血。曦車碾下朝霞屑。惆悵東風未解狂。爭教此物芳菲歇。【宋歐陽修四月九日幽谷見緋桃盛

開】經年種花滿幽谷。花開不暇把一卮。人生此事尙難必。況欲功名書鼎彝。深紅淺紫看雖好。顏色不耐東風吹。緋桃一樹獨後發。意若待我留芳菲。清香嫩蕊含不吐。日日怪我來何遲。無情草木不解語。向我有意偏依依。羣芳落盡始爛熳。榮枯不與衆豔隨。念花意厚何以報。唯有醉倒花東西。盛開比落猶數日。清樽尙可三四攜。【王安石移桃花示俞秀老】舍南舍北皆種桃。東風一吹數尺高。枝柯薦綿花爛熳。美錦千兩敷亭臯。晴溝漲春綠周遭。俯視紅影移漁舫。山前邂逅武陵客。水際髣髴秦人逃。攀條弄芳畏晚晚。已見黍雪盤中毛。仙人愛杏令虎守。百年終屬樵蘇手。我衰此果復易朽。蟲來食根那得久。瑤池紺絕誰見有。更值花時且進酒。君能酩酊相隨否。【元吾丘衍桃花雨樂府一章寄翼之】秦源春夢陽臺晚。風散驚紅作秋苑。閒陰碧樹搖暖雲。茸苔羅水香氤氲。蝶飛不濕烟綿路。吳娥怨澀鸞階步。參差海羽雙燕來。依微石舞瀟湘回。【明楊基千葉桃花】江花先好還先落。二月芳菲已蕭索。掖垣一樹獨開遲。嫩葉龍荂抱香萼。朝來小雨浥輕紅。春色千重與萬重。點注定知煩曉露。剪裁寧不費春工。春來到處尋桃李。不道東闌花自美。傷心世事總如花。何用勞勞行萬里。【憶左掖千葉桃花】穠李積皓雪。繁桃炫朝霞。江邊日日見春色。盡是尋常兒女花。東闌一樹能傾國。千瓣玲瓏誰剪刻。半吐疑紅却勝紅。全開似白元非白。旁雖淺淡正復濃。雅麗稱月閒宜風。陰時晴午各異態。噴喜笑顰無不工。嗟我匆匆簿書急。時復微吟對花立。白苧猶沾夕露香。青鞋不怕蒼苔濕。而今漂泊楚江濱。想像丰儀一愴神。惆悵當時看

花客對花還說去年人。【寫生碧桃花歌】少年慣作看花客。陌上桃花總相識。春風似向此中偏。一種花開百般色。只愛深紅更淺紅。君家此本更不同。枝上白雲吹不散。塔前明月照疑空。一縱一橫根各別。香上斜封愁欲折。畫筵紅燭人半醉。忽見此花驚是雪。武陵秦人那得知。河陽滿縣徒爾爲。當時東風千樹錦。未比君家瑤樹枝。翠禽飛來嗟易見。粉蝶棲時難可辨。紅妝美女嬌如花。著向花間應掩面。花今正開鶯亂啼。酒醒拈筆爲君題。羨君兄弟如虹蜺。豪飲不愁花下迷。玉壺清酒金偏提。秦箏琵琶羌管齊。走覓橋西舊酒伴。莫待風雨花成泥。【王弼戲題窗前小桃】小桃甚小能芬芳。乃在主人廳柱旁。忽然見此婉清揚。使我廢書典衣裳。去年柔弱風中狂。樊姬癡小未解妝。綠羅衫袂紅錦襜。一笑伴我窗風涼。一春寂寞臥桁楊。花氣撲簾聞畫香。水飄竹格小匡床。主人乃是江左王。小桃小桃弗爾傷。坐看明年廳柱長。原【王世貞】閩中喬木俱成林。林家主人饒隱心。時斲竹葉千斛酒。來坐桃花萬樹陰。澹日輕烟釀芳暝。翠羽黃鸝喚妝醒。開處疑蒸紫帽霞。澆時欲涸梅檀井。祝君度索三千春。有子仍爲金母珍。漢帝方徵上林植。可容長作武陵人。【馮琦】無棣城邊春欲暮。臥龍岡上花如霧。年年醉徹武陵烟。至今記得桃源路。桃源遍地桃花水。翠屏高傍層城起。寧可餘姿點綠蕪。肯將浮豔誇穠李。始看一逕盤空曲。漸入千枝散朝旭。滿樹殘霞爛不收。一天香雨飛紅玉。白雲深鎖揚子居。青山自愛陶公廬。平蕪十里閒看鳥。春水一竿不羨魚。大隱何須分出處。賞心豈必長林莽。桃李濃滋華省陰。公門自是韶華主。綏山一顆憶

仙家絕勝河陽萬樹花。歲歲願公懸水鏡。長將秋實代春華。【趙福元】神仙擁出蓬萊宮。羅幃繡幙圍香風。雲鬢繞繞梳翡翠。頰顏滴滴勻猩紅。千嬌百媚粲相逐。爛醉芳春逞芬馥。朝陽影裏燦紅瓊。晨霞香中咽寒玉。承恩侍宴青帝前。錦衣半脫酣晝眠。鶯鶯燕燕扶不起。巧呼苦喚殊可憐。傍欄無力嬌欲語。花羣本是桃源女。幾年流水飯胡麻。今在武陵溪上住。

【五言律詩】御製和唐太宗詠桃花卽用原韻。苑裏韶華滿。春工試綺妝。霞輕籠樹影。日暖散林光。倚檻千叢錦。開簾百和春。東風自駘宕。長護萬年芳。

【唐太宗詠桃】禁苑春暉麗。花蹊綺樹妝。綴條深淺色。點露參差光。向日分千笑。迎風共一香。如何仙嶺側。獨秀隱遙芳。【李嶠詠桃】獨有成蹊處。穠華發井傍。山風凝笑臉。朝露泣啼妝。隱士顏應改。仙人路漸長。還欣上林苑。千歲奉君王。【劉長卿晚桃】四月深澗底。桃花方欲然。寧知地勢下。遂使春風偏。此意頗堪惜。無言誰爲傳。過時君未賞。空媚幽林前。【溫庭筠敷水小桃盛開】敷水小橋東。娟娟照露叢。所嗟非勝地。堪恨是春風。二月豔陽節。一枝惆悵紅。定知留不住。吹落路塵中。【李商隱桃園】竟日小桃園。休寒亦未暄。坐鶯當酒重。送客出牆繁。啼久豔汾薄。舞多香雪翻。猶憐未圓月。先出照黃昏。【宋韓琦百井路山桃】漫嶺天桃樹。無人亦自開。雲霞深隱洞。錦繡遠成堆。生意驚樵斧。芳情謝宴杯。莫迷行客路。不似武陵回。【明高啓桃花】春色東家出。相窺似有心。曲垣遮自短。別院閉還深。影動疑人

折香搖妬蝶尋。好風時解意。吹片拂羅襟。

【原】申時行桃谿。分得玄都種。依然玉洞春。逶迤成曲徑。爛

熳及芳辰。錦疊溪邊浪。紅銷雨後塵。武陵差可擬。吾豈避秦人。

【方九功】一曲桃園樹。平沙十里春。落

花紅勝錦。藉草綠如茵。野興邀詩伴。村沽覓酒鄰。怕逢漁父問。疑是避秦人。

【陸卿子】一覩傾城貌。千

山斂夕霏。露桃差比豔。汀月借生輝。躡磴雲迎襪。凌波水濺衣。餘芳吹不散。常繞渚烟飛。

【七言律詩】原【唐杜甫題桃樹】小徑升堂舊不斜。五株桃樹亦從遮。高秋總餒貧人實。來歲還舒滿眼

花。簾戶每宜通乳燕。兒童莫信打慈鴉。寡妻羣盜非今日。天下車書正一家。【白居易晚桃花】一樹

紅桃亞拂池。竹遮松蔭晚開時。非因斜日無由見。不是閒人豈得知。寒地生材遺較易。貧家養女嫁常遲。

春深欲落誰憐惜。白侍郎來折一枝。【溫庭筠反生桃花發因題】病眼相逢四壁空。夜來山雪破東風。

未知王母千年熟。且共劉郎一笑同。已落又開橫晚翠。似無如有帶朝紅。僧虔蠟炬高三尺。莫惜連宵照

露叢。【唐彥謙緋桃】短牆荒圃四無鄰。烈火緋桃照地春。坐久好風休掩袂。夜來細雨已沾巾。敢同俗

態期青眼。似有微辭動絳唇。盡日更無鄉井念。此時何必見秦人。【李咸用緋桃花】茫茫天意爲誰留。

深染天桃備勝遊。未醉已知醒後憶。欲開先爲落時愁。癡蛾亂撲燈難滅。躍鯉傍驚電不收。何事梨花空

似雪。也稱春色是悠悠。【李中詠桃花】祇應紅杏是知音。灼灼偏宜間竹陰。幾樹半開金谷曉。一溪齊

綻武陵深。豔舒百葉時皆重。子熟千年事莫尋。誰步宋牆明月下。好香和影上衣襟。【韋莊詠庭前桃】

曾向桃源爛熳遊。也同漁父泛仙舟。皆言洞裏千株好。未勝庭前一樹幽。帶露似垂湘女淚。無言如伴息
嬌愁。五陵公子饒春恨。莫引香風上酒樓。【宋梅堯臣和江鄰幾省中賞小桃】年年二月賣花天。唯有
小桃偏占先。初見嫩紅無不喜。終知俗豔幾多妍。鄰翁已折郊園裏。貴客爭誇粉署邊。可惜工夫吟向此。
會須重醉牡丹前。【次韻和王舍人憶省中小桃寄江學士】淺綻胭脂紫蠟芳。深樹吳酎白瓊觴。鳳池
人憶去年豔。雉省客無今日狂。髣髴物華先上苑。依稀歌吹下昭陽。平明社雨莫催促。應翫移牀欲近傍。
【蔡襄過楊樂道宅西桃花盛開】城隈繞舍似山家。舍下新桃已放花。無限幽香風正好。不勝狂豔日
初斜。自憐馬上空愁望。誰向樽前與醉誇。京國難逢春氣味。莫隨塵事度年華。【孔武仲館中桃花】蓬
壺深絕鎖芳菲。初見仙桃第一枝。天近自應風景別。春長莫恨化工遲。相從朱戶人稀到。半掩香苞蝶未
知。想像江南今盛發。亦經頻雨稍離披。【陸游連日至梅仙塢及花溼觀桃花】千載桃源信不通。鏡湖
西塢擅春風。舟行十里畫屏上。身在兩山紅雨中。俗事挽人常故故。夕陽歸櫂莫匆匆。豪華無復當年樂。
爛醉狂歌亦足雄。桃花塢近釣魚磯。不比劉郎萬里歸。水底紅雲迷醉眼。樽前絳雪點春衣。病依几杖
猶能出。老愛風光未忍違。天借清遊每窮日。夜深炬火候柴扉。【張虛菴】笑披初服返林臯。小築精
廬榜慕陶。已買扁舟浮綠水。更依疎柳插紅桃。春風荏苒來三徑。歲月侵尋入二毛。却笑文章緣業在。篋
書重簡課兒曹。【金王寂桃花】應噴國色朝酣酒。賜與羽衣如太真。道士厭看千樹老。令君別換一

城新。細梅拂額更不俗。栗玉削肌殊可人。想得乞漿尋舊約。春風不似去年春。【元楊載碧桃】一枝如玉照芳春。幾度憑闌欲殢人。翠被夜寒愁灑淚。珠簾月冷怕傷神。劉郎陌上栽仍舊。王母池邊賞又新。不是梨花飄雪樹。望中清絕更無倫。【曹文晦桃源春曉】數點殘星掛綠蘿。看桃行入舊山阿。洞門花霧紅成陣。沙麓巖前翠作渦。天外曙光驚鶴夢。水邊啼鳥和漁歌。劉郎去爲無人到。吟倚東風草色多。【馬臻桃花】淺碧繁紅又滿枝。化工消息本無機。豔滋曉露鶯搖落。香漬春泥燕掠歸。金谷園中芳草在。玄都觀裏昔人非。自從雲隔天台路。劉阮如今夢亦稀。【黃可玉碧桃】洗盡嬌紅出翠帷。玉人無語背斜暉。綠華前度通仙譜。天水何年染素衣。宴罷瑤池春夢斷。影寒姑射夜深歸。禁烟時節多風雨。莫遣繁英一片飛。【明楊基桃花】深深翠竹映嬋娟。湘女梳妝立曉烟。流水落花成悵望。舞裙歌袖是因緣。也無人折休相妬。纔有鶯啼更可憐。却憶東欄碧千葉。暖風香雨爲誰妍。【陳鴻詠紅白桃花】雙豔如從露井看。妝分濃淡映雕欄。玉膚中酒冰綃薄。粉面窺人錦帳寒。杏雨並隨窗外度。梨雲同入帳中殘。膽瓶不是餘香在。定訝珊瑚間木難。【原】申時行山中看桃花【萬山迴合似天台。二月桃花已遍開。映水却疑乘浪煖。緣崖故是倚雲栽。亂紅飛雨沾衣袂。碎錦分霞入酒杯。謾道武陵仙路遠。探奇有客問津來。【方廣德】露井花時露未晞。紫文丹萼鬪芳菲。佳人南國還嬌豔。仙種西池定是非。浥雨別含濃淡態。籠烟怯逗淺深暉。祇緣瓊貌難爲侶。獨傍房陵片玉飛。【曹大章】竹徑寥寥空碧苔。雙星忽漫照高臺。唾

飛白玉風前落。鳥度青雲江上來。螭尾清班原帝侍。虎頭詞客總仙才。相逢莫問年來事。惟有桃花似舊開。
【贈】胡師閔粉紅桃花】溫情膩質可憐生。浥浥輕韶入粉勻。新暖透肌紅沁玉。曉風吹酒淡生春。窺牆有態如含笑。對面無言故惱人。莫作尋常輕薄看。楊家姊妹是前身。

【五言排律】唐章孝標玄都觀栽桃十韻】驅使鬼神功。攢栽萬樹紅。薰香丹鳳闕。妝點紫瓊宮。寶帳重遮日。妖金遍累空。色燃燒藥火。影舞步虛風。粉撲青牛過。枝驚白鶴冲。拜星春錦上。服食曉霞中。碁局陰長合。簫聲秘不通。豔陽迷俗客。幽邃失壺公。根柢終盤石。桑麻自轉蓬。求師飽靈藥。他日訪遼東。
【薛能桃花】秀氣自天鍾。千年豈易逢。開齊全未落。繁極欲相重。冷濕朝如淡。晴乾午更濃。風光新社燕。時節舊春鴻。籬落欹臨竹。亭臺盡間松。亂緣堪羨蟻。深入不如蜂。有影宜暄煦。無言自治容。洞連非俗世。蹊靜接仙蹤。子熟河應變。根盤土已封。西王潛愛惜。東朔盜過從。醉席眠英好。題詩戀景慵。芳菲聊一望。何必在臨邛。

【五言絕句】唐李商隱嘲桃】無賴天桃面。平明露井東。春風爲開了。却擬笑春風。
【鄭谷感興】禾黍不陽豔。競栽桃李春。翻令力耕者。半作賣花人。
【宋崔鶚】殘夜迷春曉。天桃怯夜寒。何人未妝洗。先傍玉欄干。
【贈】蘇軾和子由岐下桃花】爭開不待葉。密綴欲無條。傍沼人窺鑑。驚魚水濺橋。
【王十朋桃花】在處飄紅雨。臨窗照夕陽。何時清禁裏。一醉伴仙郎。
【明陳道復題桃花】春光何爛

燭桃花發滿谿。武陵香萬樹。寧不放人題。【楊基壺中二色桃花】素頰映紅腮。西園共折來。憐渠竟先落。知是最先開。【李東陽桃花】種樹乘春雨。開花待曉風。一年還一樹。隨意滿園紅。

【七言絕句】御製雨後見桃花。新雨濛濛宜五沃。蒸霞始放見錢江。初春錦繡鋪千樹。落日微吟坐北窗。

【唐李嶠從宴桃花園詠桃花應制】歲去無言忽憔悴。時來含笑吐氛氲。不能擁路迷仙客。故欲開蹊待聖君。【趙彥伯從宴桃花園詠桃花應制】紅萼競然春苑曙。丰茸新色御筵開。長年願奉西王讌。近侍慚無東朔才。【蘇頲從宴桃花園詠桃花應制】桃花灼灼有光輝。無數成蹊點更飛。爲見芳林含笑待。遂同溫樹不言歸。【李乂侍宴桃花園詠桃花應制】綺萼成蹊遍籊芳。紅英撲地滿庭香。莫將秋宴傳王母。來比春華壽聖皇。【張說桃園馬上應制】林間豔色驕天馬。苑裏穠華伴麗人。願逐南風飛帝席。年年含笑舞青春。【李白山中問荅】問余何事棲碧山。笑而不荅心自閒。桃花流水杳然去。別有天地非人間。【杜甫江畔獨步尋花絕句】黃師塔前江水東。春光嬾困倚微風。桃花一簇開無主。不愛深紅愛淺紅。【漫興】手種桃李非無主。野老墻低還是家。恰似春風相欺得。夜來吹折數枝花。【蕭八明府實處覓桃栽】春乞桃栽一百根。春前爲送浣花村。河陽縣裏雖無數。濯錦江邊未滿園。【顧況崦裏桃花】崦裏桃花逢女冠。林間杏葉落仙壇。老人方授上清籙。夜聽步虛山月寒。【劉禹

錫竹枝詞】山桃紅花滿上頭。蜀江春水拍山流。花紅易衰似郎意。水流無限似儂愁。【韓愈題百葉桃花】百葉雙桃晚更紅。臨窗映竹見玲瓏。應知侍史歸天上。故伴仙郎宿禁中。【王建宮詞】樹頭樹底覓殘紅。一片西飛一片東。自是桃花貪結子。錯教人恨五更風。【白居易寄題忠州小樓桃花】再遊巫峽知何日。總是秦人說向誰。長憶小樓風月夜。紅欄干外兩三枝。【夜惜禁中桃花因懷錢員外】前日歸時花正紅。今夜宿時枝半空。坐惜殘芳君不見。風吹狼籍月明中。【大林寺桃花】人間四月芳菲盡。山寺桃花始盛開。長恨春歸無覓處。不知轉入此中來。【下邳莊南桃花】邨南無限桃花發。唯我多情獨自來。日暮風吹紅滿地。無人解惜爲誰開。【元稹亞枝紅】平陽池上亞枝紅。悵望山郵是事同。還向萬竿深竹裏。一枝渾臥碧流中。南家桃樹深紅色。日照霞光看不得。樹小花狂風易吹。一夜風吹滿牆北。【元稹劉阮妻】芙蓉脂肉綠雲鬢。罨畫樓臺青黛山。千樹桃花萬年藥。不知何事憶人間。【白敏中桃花】千朵穠芳倚樹斜。一枝枝綴亂雲霞。憑君莫厭臨風看。占斷春光在此花。【杜牧酬王秀才桃花園見寄】桃滿西園淑景催。幾多紅豔淺深開。此花不逐溪流出。晉客無因入洞來。【雍陶過舊宅看花】山桃野杏兩三栽。樹樹繁花去後開。今日主人相引看。誰知曾是客移來。【來鵬惜花】東風漸急夕陽斜。一樹天桃數日花。爲惜紅芳今夜裏。不知和月落誰家。【曹唐題武陵洞五首】此生終使此身閑。不是春時且要還。寄語桃花與流水。莫辭相送到人間。溪口回舟日已昏。却

聽雞犬隔前邨。殷勤重與秦人別。莫使桃花閉洞門。却恐重來路不通。殷勤回首謝春風。白雞黃犬不將去。且寄桃花深洞中。桃花夾岸杳何之。花滿春山水去遲。三宿武陵溪上月。始知人世有春時。渡水傍山尋絕壁。白雲飛處洞天開。仙人來往無行迹。石逕春風長綠苔。【周朴桃花】桃花春色暖先開。明媚誰人不看來。可惜狂風吹落後。殷紅片片點莓苔。【司空圖移桃栽】獨臨官路易傷摧。從遣春風恣意開。禪客笑移山上看。流鶯直到檻前來。【鄭谷小桃】和烟和雨遮數水。映竹映邨連灞橋。撩亂春風耐寒食。到頭贏得杏花嬌。【吳融桃花】滿樹如嬌爛熳紅。萬枝丹彩灼春融。何當結作千年實。將示人間造化工。【陸希聲桃花谷】君陽山下足春風。滿谷仙桃照水紅。何必武陵源上去。澗邊好過落花中。【桃蹊】芳草霏霏遍地齊。桃花脉脉自成蹊。也知百舌多言語。住向春風盡意啼。【無名氏桃花行】源水叢花無數開。丹跗紅萼間青梅。從今結子三千歲。預喜仙遊後摘來。【宋王禹偁看桃花】野桃無主滿山隈。仙客攜樽獨自來。盡月馨香留我醉。每春顏色爲誰開。【原】種放桃花【習習香薰薄薄烟】杏遲梅早不同妍。山齋盡日無鶯蝶。只與幽人伴醉眠。【梅堯臣和鄰幾學士桃花】深殿有春人到稀。武陵雖說味當時。躊躇莫憶人間世。恐至塵中悔却遲。【歐陽修和江鄰幾學士桃花】草上紅多枝上稀。芳條綠萼憶來時。見桃著子始歸後。誰道仙花開落遲。【蔡襄後舍緋桃】十年樹底折香葩。蔌蔌浮光弄晚霞。只恨無情是風雨。直將紅片入西家。【南劍州芋陽舖見臘月桃花】可笑天桃耐雪風。

山家牆外見疎紅。爲君持酒一相向。生意雖殊寂寞同。【建溪桃花】何物山桃不自羞。欲乘風力占溪流。仙源明有重來路。莫下橫枝礙客舟。【過南劍州芋陽舖見桃花】七年相別復相逢。牆外千枝依舊紅。只有蒼顏日憔悴。奈緣多感泣春風。【劉敞】小樓西望那人家。出屋香梢幾樹花。只恐東風能作惡。亂紅如雨墮窗紗。【邵雍二色桃】施朱施粉色俱好。傾國傾城豔不同。疑是蕊宮雙姊妹。一時攜手嫁東風。【石延年詠小桃】生色深紅綬帶長。宮簾寒在井欄香。誰家升上瑤池品。先得春風一面妝。【范成大次韻周子充正字館中緋碧兩桃花】碧城香霧赤城霞。染出劉郎未見花。憑仗天風扶絳節。爲招萼綠過羊家。【張恭甫正字折贈館中碧桃因次子充韻】滿枝晴雪照青霞。舊識桃源暈碧花。俯仰京塵隔年夢。東風猶認故人家。【陸游泛舟觀桃花】花徑二月桃花發。霞照波心錦裏山。說與東風直須惜。莫吹一片落人間。桃源只在鏡湖中。影落清波十里紅。自別西川海棠後。初將爛醉答春風。種桃亦解比封君。世故紛紛寂不聞。九轉金丹應已熟。全家仙去隱紅雲。湖南小山花更多。不醉將如春色何。釣得鮮鱗堪斫脰。任教微雨濕漁蓑。鄰曲一生花裏活。邨翁疑是古遺民。初來自被春留住。枉道當時爲避秦。【楊萬里神堂鋪前桃花】北江二月正春寒。初見桃花喜未殘。臘月潮州見桃李。元來不作好春看。【吳儼雪中桃花】天桃先已醉春風。青女猶爭造化功。應與騷人嫌太赤。故將鉛粉注深紅。粲粲乘鸞萬玉妃。宵將紅豔鬪光輝。只應侍宴瑤池罷。猶帶天邊醉色歸。【曾季狸】衣裁綢繢